

ROBERT MARIĆ

LIPA NAŠA BAJKA

I dok nan se brda pritvaraju u smeće, a smeće u brda, naš velegrad je cili ka u bajci - bespravnoj, jer sve ča se u njemu događa, teško je povirovat da je stvarno.

Dok gori u centru moći svaki majmun ima svoga gorilu, u našen bespravnon velegradiću jedva da ima pet policajci. I di to ima, ako ne samo u bajci.

Pogledajte samo ceste, koji je tu sklad i smirenost. Nema berlavi šoferi ča ćedu izać iz auta iza vas i kroz prozor van dat šaku u glavu. Ajme ti je majci, toga samo u bajci.

Sklad vlada i u nazivin ulic, pa se tako bez da se iko buni, zna dogodit da jedna ulica promini tri naziva, pa kućani imaju svak svoju adresu, jerbo nisu u isto vrime vadili dokumente.

A kako nan niti gradonačeenik ne izgleda stvaran, ni ka pravi, još je jedan dokaz da živimo u bajci, a da ne spominjemo one oko njega, koji su ka niki likovi vilenjaci, bespravno podignuti.

A baš naš gradonačeenik je izjavija da Kaštila imaju 50 sportski klubov i 70 kulturni udrug, ča je opet ravno bajci, ali ti podatak govori koliki smo grad i koliko smo sportski i kulturno uzdignuti. Jer, ako imamo samo na divlje jednu 50.000 stanovnici, plus oni pitomi, oću reć legalni, onda ispada da dođe jedan sportski klub na ijadu svita, a kulture i više, ča je svjetski nivo, ako ne i iznad. Dakle, opet bajka. Po tome imamo oko 12000 ilegalno izgrađeni objekti, pa ispada da je 90% Kaštili ilegalno, a di se nego u bajci može dogodit da se cili jedan grad napravi proti zakona, a da se ne pita ko je to dopustija.

Ma naša bajka se vidi i po zdanjima koja se gradu do oblaka. Nema više prizemlje i kat, i gotovo. Sad se radu dvorci u raznin bojan i oblicin, podzemne garaže...i to više nema veze s razumon, pa zato i jesmo u bajci.

A u našoj bajci dogodila se i invazija 800 marinci na Kaštela. Ti marinci su divlji i cila Kaštila su se bila pripala da bi mogli onako na divlje sorit sve ča se zgradilo na divlje i pitomo. A bilo je niki koji su se čudili ča to Marinci jemadu kontra Kašteli i odokle toliko Marinac, možebit da ima koji i iz Vinišća i Sevida, pa su niki Kaštelani koji imadu rod u Marini odili vidit ča se to događa, a onda jin je objašnjeno da to nisu Marinci iz Marine nego marinci iz NATO Amerike.

U našoj kaštelanskoj bajci nema zlobe radi zlobe, ne mrzi se da bi se mrzilo, iz zavisti i ljubomore. Ovde je tolerancija i ljubav. A tolika je tolerancija, da se tolerira svaka brzina i svako vozilo, bilo ono registrirano ili ne. Toleriraju se i mladi motoristi koji se zabavljaju kako po cesti tako po rivi, i ne bi bilo pristojno šta in prigovorit, sve su to fi ni momci, a ako je koji divlji, onda je Bosanac oli Vlaj, ne može to bit pravi Kaštelanin, ma kakvi, toga ima samo u bajci.

Hotel Palace se zatrapa gori poviše Rudin, uništila se ritka i zaštićena crnika, ugrozile se podzemne vode koje idu doli u Kaštila. Najprije je vilenjak Šuško demantira da je to Palac, pa je onda prizna, jer su se našli dokazi. I digla se malo graja, slikali se dežurni manekeni za ekologiju iz Naše Liepe - i gotovo. I di to može bit nego u bajci.

U Lećevici će se gradit deponij za smeće od 50 gradov i opet nikome ništa, a lipo se znanstveno dokazalo da će se otrovat i potrovat sve živo. I je li vidite da se to ne može zapravo dogodit, nego jedino u bajci.

Našu stranicu www.poklade.com sa svi stran se izblokiral i iznapadalo, dok je jednoga dana nisu skroz satrali i pojavila se slika na kojoj je pisalo da su je zapocesali turski hakeri. A možebit su to domaći janjičari iz Kaštili, naš koji Turac.

Prošle godine, za svetoga Duju je prodano 4000 bejzbolski palic. Ko zna koliko je ti palic završilo u našen gradu, jer kako vidimo i u nas je strašno posta popularan, ma ne tenis, nego reket, a igra se palicon. Baš nikako bajkovito.

I ove godine je Grad dilija božićnice od 100 kun penzionerin, i opet za cila Donja Kaštila na jednon mistu, tako da je opet lipi broj penzioneri osta bez ti sto kun. Koji lipi potez Grada - ka u bajci.

EKO projekt ide tuta-forca, kanalizacija svima, svi kanalizaciji. Ali zanimljivo je da se kolektori radu uglavnon

na gradskin plažan, i je da neće smrdit, ali nije da se baš neće znat da se tu, da prostitute, mišaju govna. I nisan baš siguran da će bit navala na plaže. Da bajka!

A inače se gradi i radi ka da smo najbogatiji na svitu, di kome svane, tu se udre cesta, most...ka da nan euri s neba padaju. I je li to može bit stvarno? Ne može. Bajka.

(Uvodnik *Maškaduru* 05.02.2008.)